

Date – 07/09/2025
Time - 07:30 -07:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Tourism Minister Pu Lalnghinglova Hmar chuan Lo Zawhpui chu Mizo ngaia an neih ni mah se, state pawn lam mite hip thei tak leh Mizoram an tlawh chak chhan a ni thei niin a sawi.
2. Food, Civil Supplies & Consumer Affairs department chuan thuchhuah siamin, kumin March thla atanga ration card siamthat leh tihdanglam theih loh chu eng emaw zat tihdanglam theih a nih tawh thu an sawi.
3. Prime Minister Narendra Modi-a'n Mizoram a rawn tlawh turah inbuatsaihna chu ngawrh chhoh mek a ni.
4. Prime Minister Narendra Modi chuan nimin khan France President Emmanuel Macron nen international leh ram chhung dinhmun hrang hrangah chungchang sawidunna hun an hmang.

<><><>

TOURISM

Tourism Minister Pu Lalnghinglova Hmar chuan Lo Zawhpui chu Mizo TEN ngaia an neih ni mah se, state pawn lam mite hip thei tak leh Mizoram an tlawh chak chhan a ni thei niin a sawi.

Tun hnai khan Pu Lalnghinglova Hmar leh Agriculture Minister Pu PC Vanlalruata ten, Association of Tour Operators Mizoram (ATOM), Tourism Department leh Agriculture Department tangkawpten Agro Tourism chawikan nan Hmuntha Zau Lo Zawhpui an buaitsaih an hman pui a.

Tourism Minister chuan, khualzin mite hip nan Lo Zawhpui chu tangkai taka hman theih a ni, a ti a. Tawi Tlang chu tourism hmun atana puan a ni tawh tih Minister chuan a sawi a. Khualzinten an tlawh chak theih nana chei a nih tur thu leh India ram hmelhriat khawpa chei tuma ruahmanna an neih mek thu a sawi bawk.

Agriculture Minister Pu PC Vanlalruata chuan loneituten hlim taka lo zawhna hun an hmang thei chu a lawmpui a. A bial chhung Hmuntha khua chu khaw taima tak an nih thu leh Tourism Department ten hma thar lakna tlak an ni tih hria a, ruahmanna an siamsak avang leh home stay sa tura hma an lakpui avangin lawmthu a sawi bawk.

Tourism Director Pi R Lalrodingi pawhin thu sawiin, Mizo nuna bet tlat lo zawh chu tunlai mil deuha tih theih a ni em, tih an enchhin tawh a, zawngchhang tlak niin an hria tih a sawi a. Kumtluana hah taka hnathawktute tan hlim ni an ni, tiin, nakinah chuan state pawn atanga rawn chhimtute pawh an la awm zel turah an beisei tih a sawi bawk.

<><><>

RATION CARD

Food, Civil Supplies & Consumer Affairs department chuan thuchhuah siamin, kumin March thla atanga ration card siamthat leh tihdanglam theih loh chu eng emaw zat tihdanglam theih a nih tawh thu an sawi a; ration card thar siam leh chhungkuaa hming dah belh erawh tih theih a la nih loh thu a tarlang.

FCSCA department chuan, Ministry of Consumer Affairs, Food and Public Distribution chuan Public Distribution System (PDS) hnuai mipuite hamthatna turin SMART-PDS (Scheme for Modernisation and Reform Through Public Distribution System) a siam thu an tarlang a, "SMART-PDS hian a tum chu mipuite'n awlsam zawka ration card-a hming thlak, hming paih, insawn, card thlak, card print leh a dangte a huam a ni, an ti.

SMART-PDS hman a nih dawn avangin kumin March thla atangin ration card khawih danglam theih a nih loh thu tarlangin FCSCA chuan, Application thar hi hman vat a nih theih nan Mizoram FCSCA department chuan theihtawpin hma a la tih an sawi a, tun dinhmunah ration card kaihnawih thil eng emaw zat tihdanglam theih a ni tawh, an ti a; tihdanglam tur nei tan mahni bialtu DCSO-ah ngaihven theih a nih thu a tarlang bawk.

<><><>

PM

Prime Minister Narendra Modi-a'n Mizoram a rawn tlawh turah inbuatsaihna chu ngawrh taka neih chhoh mek a ni a, Aizawl khawpui kawngpui leh a chhehvel chu nimin khan tihfai chhunzawm a, hmun thenkhat lai rawng hnawih a ni bawk.

Aizawl Municipal Corporation (AMC) hmalakna in Chanmari, Bawngkawn leh Chaltlang kawngpui dung te chu tihfai a ni a, hmun thenkhat lai chu rawng hnawih thar a ni bawk - AMC bakah hian Urban Development and Poverty Alleviation Department (UD&PA) bakah PWD te pawhin hma an la bawk a ni.

AMC thuneitute hnen atanga Akashvani thu dawn danin, Prime Minister Narendra Modi hian Thuampui Helipad atanga Lammual a pan dan tur sawi chian theih a la ni lo a, kawngpui a zawh theih tur Bawngkawn atanga Chaltang panna leh Bawngkawn atanga Ramhlun lam kalna te chu uluk taka tihfai bakah kawng chhe lai thawm that a ni a, kawngsir hmun thenkhat chu rawng hnawih thar a ni bawk.

(Ruahman dan chuan Prime Minister Narendra Modi hian Bairabi atanga Sairang thleng rel kawng luhna tur chu September ni 13, Inrinni hian Lammual atangin a rawn hawng dawn a, hemi atan hian Mizoram chu kawng hrang hrangin a lo inbuatsaih a, Pu Modi-a'n a paltang theih tur kawngpui huam china awm Local Council 14 te chu anmahni huam chhung tifiin an hnattlang bawk a. ACM atanga thu kan dawn danin, Prime Minister lo kal tur atan hian faina lamah chuan inbuatsaihna pawh tha taka peih fel hman beisei a ni.)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

GST

Sorkar laipuiin chhiah Goods & Services Tax (GST) lak dan tur thar a tih chhuah ah, lirthei tam tak chu man tlawm zawkin a lei theih dawn a ni.

Akashvani zawhna chhangin LBS Suzuki General Manager Ricky Varte chuan, GST Reform 2.0 hman a nih hunah chuan, lirthei ke hnih nei leh ke pali nei thenkhatah chuan tun hma lama chhiah lak thin zaa 28 chu zaa 18 thlenga tih hniam a ni thei dawn a ti a, hei hian lirthei man a tih hniam dawn avangin lirthei leitu mipui tan a tha dawn hle a ni a ti.

LBS Suzuki chuan lirthei zuartu lam tan hlawkna tur niin lang rih lo mah se, mipui tan a that avangin GST lak dan thar hman tur chu lawmawm an tih thu an sawi bawk a ni.

Hetihlai hian Aizawla ei tur zuar dawr thenkhat chuan GST thar hman tur chu a tha dawn nge tha dawn lo an la sawi thiam lo tih an sawi a ni.

<><><>

PM and France

Prime Minister Narendra Modi chuan nimin khan France President Emmanuel Macron nen international leh ram chhung dinhmun hrang hrangah chungchang sawidunna hun an hmang a, Ukraine rama buaina chhuak chu a rang lam tihtawp a nih theihna tura hmalaknate an sawi dun a ni. India-in buaina hi remna zawnga chinfel a, remna leh muanna a awm theih nan a thlawp reng thu a sawi nawn leh a ni. Telephone hmanga inbiaknaah hruaitu pahnihte hian kawng hrang hranga ram pahnihte thawhhona kawnga hmasawna awmte an thlirlet a, an zirchiang bawk. Social media post-ah Prime Minister Modi chuan India-France Strategic Partnership chuan khawvel pum huapa remna le muana awm theih nan hmun pawimawh tak a chang chhunzawm thu a hrilh a. President Macron-a’n nakkum February thlaa India-in AI Impact Summit a buatsaih tura sawmna a pawm avangin lawmthu a sawi bawk a ni.

Tun hnaï khan Prime Minister Modi hian European Council President António Costa leh European Commission President Ursula von der Leyen te nen pawh inbiakna a lo nei tawh bawk a. India leh EU FTA chu a tihfel a nih theih nan leh IMEEC corridor kalpui a nih theih nan thutiam an nemngnet leh a ni. Ukraine rama buaina tihtawp nan hmalakna chungchangah ngaihda an sawi ho bawk.

<><><>

GST Reforms

Sorkar chuan GST thar hian cooperative sector a tichak dawn a, an thil siamte chu inelna nei thei turin a siam dawn a, an thil siamte mamawhna a tipung dawn a, cooperative-te sum lakluh pawh a tipung dawn a ni, a ti. Thuchhuah siamin, Ministry of Cooperation chuan GST siamthatna hian thingtlang lamah mahni kutkawiha ei zawng a tipung dawn a, food processing sector-a cooperative-te a tipung dawn a, chhungkaw maktaduai tam takin bungraw pawimawh man tlawm zawka an hmuh theih nan a pui dawn a ni, a ti.

Ministry chuan, GST siamthatna hian cooperative, loneitute, thingtlang lama hmalaknate ah nghawng a nei dawn a, ram chhunga bawngnhnute hmanga

eizawngtute nuai 10 chuangten an hlawkpui dawn a ni, a ti. GST rate tihhniam hian loneih leh ran vulh tu ten an hlawkpui dawn tih sawiin, loneih dan tha tak a tipung dawn a, loneitu tenau zawkte pawhin an hlawkpui dawn tih a sawi baw. Prime Minister Narendra Modi kaihruaina hnuaia heng Next Generation GST siamthatna te hi dairy cooperative sector zawng zawngin an fak hle a, cooperative brand lian tak tak te pawhin an fak hle a ni.

